



RE LAURIN E L'ENROSADIRA

Chi tempes veies e veiores, i spic de Vaiolon e Ciadinac no era biota crepa, descheche i vedon anchecondi, ma l'era monts corii de reses che dajea fora n bon parfum. Te anter chesta reses, chécenes desché l sanch, stajea de cèsa n popul de morchies, comanà da n re valent e ascort, che aea inom Laurin.

No mures, no sieves defenea chest bel ream; demò n fil sotil de seida segnèa l confin, ma ampò nesciugn aessa fidà crepèr laite contra l voler del Re, ajache duc cognoscea la potenza misteriosa de chel popul.

Sot ite l crep jia ite corridores e gran sales, riches de òr, arjènt e tesores de ogne sort. I morchies lurèa dassen a ciavèr fora del crep i minerèi preziosc, e chest fajea la gran richeza del ream.

Laurin era ben picol, ma fort e de gran ardiment. L'aea poderes de magia, e èrmes fates dai morchies co l'èrt di faturec. La centa de so quant ge dajea la forza de doudesc omegn.

Na dì Laurin l vegn a saer che te n ciastel aló vejìn stajea na tousa bela desché l soreie, la fia del re, e l se à pissà de la domanèr per sposa. Sobito l'à manà trei morchies a rejonèr col re. Rué che i é stac te dant a chel ciastel, i sudé che ge fajea la vèrda i no n volea saer de i lascèr ite.

“No sarà mia ambasciadores chisc, no sarà mia jent da vegnir a tratèr co nos!”

Ma l Re à ampò volù i tor dant, e con bela maniera l'à scutà sù chel che i aea da ge dir.

“Re Laurin domana voscia fia per sposa, potent Segnor!”.

Nesciugn te chel ciastel aessa mai cherdù che l Re di morchies abie tant ardiment, e la Prinzessa se sà ben à refudà.

I trei ambasciadores à bele cognù jir de retorn a ge portèr la trista neva a Re Laurin. Amò i sudé ge n dijea dò, e se grignèa de ic.

Ma Re Laurin col faturec l'é ampò stat bon de ge ruèr apede a la Prinzessa senza che nesciugn veide: coscita l'à ciapèda e l'à serèda via te so palaz sot ite i crepes.

Aló la era prejoniera, ma ence pa servida e reverida dut intorn, desché che ge convegna a na reina. Egn a la longia i l'à tegnuda aló, senza che i sies saessa che che ge era sozedù.

Zacan l Re, so pèr, é vegnù en consaputa che Laurin tegnìa la tousa prejoniera. Per la librèr l'é jit per didament da Teodorich, gaèrt verier, segnor del ream de Verona. Chest se à metù sobit a cef de cent sudé per jir a chierir la fia del Re so amich. N pez i é jic coran a stroz per monts e val, senza troèr la dreta strèda. Zacan dalonc i veit n mont fora di etres, ciareà de reses lumenouses: chel l'era l ream de Re Laurin!

Rué che i é stac ló sul confin, i veit l fil de seida che jia dut entorn l resolé maraveous.

L nobol Teodorich é restà cet aló, encantà da chel spetacol, ma i sudé che era con el no ge à pissà doi outes: i sbrega ite l fil e taca a pesticèr senza maniera i fiores.



De colp é comparì n picol om, armà de friza e sàbia, con guanc da gran signor: l'era Laurin, l Re di morchies, vegnù a defener da l'enjuria so ream.

Teodorich da Verona se à fat inant, e i doi à scomenzà sobit l grief combatiment.

L nobol Teodorich stentèa a ge tegnir per mez a la gran furia de Laurin, didà dai faturec.

Ma n servidor saea che l segret stajea te chela centa, e l ge à cigà via a so patron de ge la tor demez. Te chel moment che Teodorich à abù te man la centa portentousa se à desfantà duc i poderes de Laurin, e bele prest l'auter à abù la venta.

Enlouta i sudé nemisc é crepé ite tel ream, e da na sfessa te la crepa é vegnù fora la prinzessa con duta sia fanceles. La tousa era contenta de veder endò la jent de so ciastel, ma ge encrescea che l ream de Laurin, chel bel vidor de reses, vegne tost derenà.

“Laurin é stat valent co me: l me à onorà e tegnù sche na reina. L'é ora de lascèr cetes la èrmes, che posse endò vegnir la pèsc te anter nesc popui!”.

A Teodorich ge à sapù dret chest rejonèr, e l ge à tocià la man a Re Laurin. Ma l pat no ge scusèa a duc i verieres: chi più superbesc i é se n jic de retorn contra l ciastel.

Ai etres ge dijea Laurin:

“Ades che sion amisc, vegnide ite te mi palaz sot ite l crep. Ve moscaré duc mi tesores, e faron festa n vosc onor!”.

Trei dis é jita inant la festa per zelebrèr l pat, con cianties, bai, vin e proviandes de ogne sort. E l'ultim dì, dò mesanet, duc dormìa fon, stencé, e dut era chiet tel palaz de Laurin.

De n trat, rua un di vardians coran:

“Sudé nemisc! - l ciga - i é chiò che i vegn dò sù te anter la reses! A l'èrmes, jent, a l'èrmes!”.

Laurin destrametù à cridà al tradiment:

“Che i fausc amisc tost vegne metui te prejon!”.

Ma Teodorich e i sies ge à ruà a sciampèr...

Na fola de sudé nemisc era oramai sun usc: Laurin e i morchies se à studià a corer fora per defener l ream, e dut l dì i se à batù con ardiment fin canche i à abù forza.

Chest'outa à abù i nemisc la soramessa.

I morchies cejea mazé un dò l'auter, e ence Laurin da en ùltima é stat ciapà e menà demez.

L ream de la reses era perdù.

Laurin vegnìa tegnù te pera condizions, dalonc da cèsa, te na prejon tumia e foresta, senza nesciun confort.

Passèa i egn, e l veie Re aea encresciujum de sia jent, e de la libertà.

Co che la é stata no se sà: a Teodorich fosc l ge à fat pecià, e l ge à lascià troèr na bela di l'usc de prejon avert.

Dis e nets a la longia à viajà Laurin, per troes e vièi, dant de ruèr dant da si monts...

Canche ge é comparì te dant l bel vidor de reses, con so color scarlat sora la dascia, Laurin é vegnù fora a dir:



“La reses me à tradì. Se i chi no fossa stac metui sun strèda da la reses, mai no i aessa descori l ream. Che neshugn les posse più veder, tant de dì che de net!”.

E con n encanteisem Re Laurin à mudà l resolé te biota crepa.

Ma l’encanteisem aea lascià fora l’anterores e da enlouta, cò fior soreie, chi crepes i se entenc del bel color de enrosadira: l’è l color de la reses de Re Laurin.

RE LAURIN E L’ENROSADIRA
contia ladina
dessegnes de Gianna Sommavilla
adatament de Fabio Chiocchetti

Istitut Cultural Ladin
"Majon di Fascegn"
1992